



Dorothea «Dorli» Hendry- Mutzner, Sedrun 1943 - 2009

Dorli Mutzner ei naschida ils 27 da fevrer 1943 e carschida si aunc cun 4 fargliuns a Maiavilla. Ella vegliadetgna da 14 onns ei la famiglia da Dorli sereratga a Cuera. Leu ha ella frequentau ils davos onns da scola ed era absolviu silsuerter igl emprendissadi sco cusunza.

A Cuera ha ella era giu fatg amicezia cun siu mariu Giachen Hendry. Igl onn 1963 marida ella il Giachli da Sedrun ed els ein secasai a Cuera. Igl onn 1964 ei fegl Urs naschius e 4

onns pli tard aunc la feglia Alice. La famiglia Hendry ei stada sesenta a Cuera entochen ch'ils dus affons han giu ventschiu la scolazion. Il fegl Urs haveva giu absolviu igl emprendissadi sco dessignader da construczion bassa el biro d'inschignier da siu bab Giachen. Gia cun 30 onns miera el entras l'inflammaziun dil tschurvi «Hirnhautenzündung». La mort prematura dil fegl Urs ei stau per la Dorli e pil Giachen ina gronda frida. La feglia Alice ha absolviu igl emprendissadi mercantil e lavura aunc oz sin quella professiun.

Aschiditg cu Dorli e Giachen habitavan aunc a Cuera, passentavan els il temps liber savens a Sedrun. Cun l'entschatta 1990 ha la famiglia Hendry-Mutzner priu dimora a Sedrun, nua che Giachen ha entochen tier la pensiun menau igl uffici da baghegiar dalla vischnaunca da Tujetsch. Era la Dorli ei sevivida en beinspert a Sedrun ed ha immediat empriu il patua tuatschin. Dorli ha encuretg il contact, e sia spontanadad ed il cooperar en differentas unius ha gidau ad unir biars e buns contacts. La gronda passiun da Dorli era il giugar troccas. Dorli e Giachen gudevan era la fauna e flora. Tier mintga spassegiada astgava il perspectiv buca muncar e Dorli persequitava ella natira ils animals selvadis. In'autra passiun era il viagiar. Las vacanzas «annualas» d'atun el Tirol dil sid s'udevan tiel program.

Schegie che Dorli ha stuiu surmuntar la nauscha frida dalla prematura mort dil fegl Urs ed ils differents mals corporals, ha ella mai piars il plascher da viver. La dumengia, ils 28 da fevrer 2009 ha ella aunc astgau festivar en ravugl da sia famiglia - sco adina da buna luna - siu 66avel natalezi. Gie, la migeivla e cuntenteivla Dorli gudeva la veta communablamein cun siu mariu Giachen. Varga 45 onns ein Dorli e Giachen caminai ensemes ed els carezavan e respectavan in l'auter sco igl emprem di da lur amicezia. Dapi che Giachen ei pensiunaus, deva ei strusch in di ch'els dus trafficavan buca enzatgei ensemes. Gie ei era in deletg d'obsevar quei «perli». Jeu ed aunc biars havessen cuiu ad els dus da saver guder ensemes la pensiun aunc biars onns.

Mesjamna endamaun, ils 4 da mars 2009 ha la Dorli priu bufatgamein - sco ella viveva - cumiau dil mund terrester .

Cara Dorli, Tia emperneivla demanonza ei stada per nus tuts in muossavia. Nus empruein da mantener Tei en buna memoria. Ruaussa en pasch.